

## HOOFSTUK 3: LIDMAATSKAP

### 1. INLEIDING

- 1.1 Hierdie hoofstuk handel rondom die prosedure om lidmaatskap van *Die Voortrekkers* te bekom.
- 1.2 Lede van *Die Voortrekkers* wat tydelik buite die grense van Suid-Afrika of Namibië bly kan steeds lede van *Die Voortrekkers* bly mits hulle by 'n bestaande Voortrekkerkommando, los Veldkornetskap of Staatmakergroep registreer.

### 2. VOORSKOOLESLEDE: ONTDEKKERS

- 2.1 Kinders in hulle jare voor Graad 0 of R word nie lede van *Die Voortrekkers* nie, maar kan wel aan alle aktiwiteite van *Die Voortrekkers* deelneem.
- 2.2 'n Ontdekker is nie 'n geregistreerde jeuglid van *Die Voortrekkers* nie en betaal nie ledegeld nie. Sy ouers moet die vrywaringsvorm vir nie-lede teken alvorens hy aan enige aktiwiteite mag deelneem.
- 2.3 'n Ontdekker volg nie 'n spesifieke werksprogram nie en kry nie enige formele erkenning vir aktiwiteite afgehandel vanaf *Die Voortrekkers* nie.
- 2.4 'n Ontdekker ontvang nie enige getroue diens erkenning nie.
- 2.5 'n Ontdekker mag aktiewe Voortrekkerdrag dra.

### 3. JEUGLEDE

- 3.1 'n **Penkop** is 'n skoolgaande seun van Graad 0/R tot die sewende skooljaar.
- 3.2 'n **Drawwertjie** is 'n skoolgaande dogter van Graad 0/R tot die sewende skooljaar.
- 3.3 'n **Verkenner** is 'n skoolgaande seun of dogter van die agste tot die twaalfde skooljaar; of 'n seun of 'n dogter wat reeds die skool verlaat het maar nog nie agtien (18) jaar oud is nie.
- 3.4 Alle jeuglede word geregistreer, betaal ledegeld, dra aktiewe en formele voortrekkerdrag en kan in aanmerking kom vir al die toekennings wat deur *Die Voortrekkers* gemaak word.

### 4. STAATMAKERS

- 4.1 'n **Staatmaker** is 'n naskoolse man of dame, tussen die ouderdomme van agtien (18) en agt en twintig (28) jaar, ongetroud of getroud sonder skoolgaande kinders.
- 4.2 Alle Staatmakers word geregistreer, betaal ledegeld dra aktiewe en formele voortrekkerdrag en kan in aanmerking kom vir al die toekennings wat deur *Die Voortrekkers* gemaak word.

### 5. OFFISIERE

- 5.1 'n **Offisier** is 'n naskoolse persoon van agtien (18) jaar en ouer wat 'n bepaalde amp soos omskryf in hoofstuk vier (4) in *Die Voortrekkers* beklee.
- 5.2 Alle offisiere word geregistreer, betaal ledegeld, dra aktiewe en formele voortrekkerdrag en kan in aanmerking kom vir al die toekennings wat deur *Die Voortrekkers* gemaak word.

### 6. HEEMRAADSLEDE

- 6.1 'n **Heemraadslid** is 'n naskoolse persoon van agtien (18) jaar en ouer wat deur die jaarvergadering aangewys is om op die Kommandobestuur te dien.
- 6.2 Alle Heemraadslede word geregistreer, betaal ledegeld mag aktiewe en formele voortrekkerdrag dra en kan in aanmerking kom vir al die toekennings wat deur *Die Voortrekkers* gemaak word.

### 7. VOORTREKKERVRIENDE

- 7.1 'n **Voortrekkervriend** is 'n naskoolse persoon van agtien (18) jaar en ouer wat deel is van 'n lojale ondersteunersgroep wat 'n Voortrekkerkommando, gebiedskamp of ander groepering in *Die Voortrekkers* bystaan met take wat aan hom opgedra word.
- 7.2 'n **Voortrekkervriend** word wel geregistreer by 'n Voortrekkerkommando maar betaal nie ledegeld nie.

- 7.3 'n *Voortrekkervriend* ontvang nie getroue diens erkenning nie.  
7.3 'n *Voortrekkervriend* mag aktiewe voortrekkerdrag dra.

## 8 ERELEDE

- 8.1 'n **Erelid** is 'n persoon aan wie die hoofbestuur erelidmaatskap toeken.  
8.2 Erelidmaatskap word toegeken aan enige oud-lid van *Die Voortrekkers* wat na die oordeel van die hoofbestuur oor 'n lang tydperk besondere diens aan *Die Voortrekkers* as Voortrekker gelewer het.  
8.3 Erelidmaatskap kan ook aan bestaande lede, met ten minste twintig (20) jaar aaneenlopend diens, op ouderdom van vyf en sestig (65) jaar en hoër, wat na oordeel van die hoofbestuur 'n besondere diens aan *Die Voortrekkers* gelewer het, toegeken word. Die persoon kan steeds voortgaan om as offisier diens te lewer, en getroue diens kenteken en ander toepaslike toekennings, te ontvang.  
8.3 Die hoofbestuur ken erelidmaatskap uit eie beweging of op grond van 'n behoorlik gemotiveerde aansoek van 'n gebiedsbestuur toe.  
8.4 Die hoofbestuur stem per geslote stembriefie oor die aansoek en die toekenning geskied slegs indien minstens twee derdes van die aanwesige lede van die hoofbestuur ten gunste daarvan stem.  
8.5 Die toekenning van erelidmaatskap aan die betrokke persoon geskied tydens 'n funksie wat vir die doel gereël is deur die Hoofdagbestuur of 'n Gebiedsdagbestuur op koste van die hoofbestuur. Die toepaslike 'n Oorkonde en 'n erepenning word by die geleentheid oorhandig.  
8.6 'n Erelid wat nie meer as offisier diens lewer nie mag wel aktiewe voortrekkerdrag dra.  
8.7 'n Erelid betaal nie ledegeld nie.

## 9. BESKERMHERE

- 9.1 'n **Beskermheer** is 'n persoon wat na die oordeel van *Die Voortrekkers*, vanweë sy/haar invloed / posisie in die samelewing, beskerming kan verleen aan die belange van *Die Voortrekkers* op nasionale-, gebieds-, oord- of kommandovlak. 'n Beskermheer se termyn word bepaal deur die betrokke bestuursliggaam wat die beskermheer aanwys.  
9.2 Beskermhere kan vir die volgende vlakke soos volg benoem word:  
9.2.1 Op Nasionale vlak word net een Hoofbeskermheer en een Hoofbeskermvrou benoem;  
9.2.2 Op Gebiedsvlak word soveel Gebiedsbeskermhere en Oordbeskermhere of -vroue benoem as wat die betrokke gebiedsbestuur nodig ag;  
9.2.3 Op Kommandovlak word net een Kommandobeskermheer of –vrou benoem.  
9.3 'n Beskermheer moet aan die volgende vereistes voldoen:  
9.3.1 Hy/Sy moet 'n hoë profiel in die betrokke gemeenskap handhaaf en daartoe in staat wees om die belange van *Die Voortrekkers* te beskerm;  
9.3.2 Hy/Sy moet homself vereenselwig met die grondslag, wese en doelstellings van *Die Voortrekkers* en bereid wees om dit in die openbaar en op persoonlike vlak uit te leef;  
9.3.3 Hy/Sy moet bereid wees om die belange van *Die Voortrekkers* in die betrokke gemeenskap te bevorder in sover dit moontlik is om dit te doen op die vlak waarop hy/sy funksioneer;  
9.3.4 Hy/Sy moet gewillig wees om bepaalde byeenkomste op die vlak waarvan hy/sy beskermheer is by te woon en sekere funksies te verrig wat op daardie vlak van hom/haar verwag word;  
9.3.5 Hy/Sy moet hom op persoonlike en openbare vlak verbind tot die morele en praktiese ondersteuning van bepaalde projekte wat *Die Voortrekkers* as sodanig of in samewerking met ander instansies aanpak of bedryf.  
9.3.6 Die Hoofbeskermheer en Hoofbeskermvrou word van die een kongres tot volgende kongres aangewys.  
9.3.7 'n Gebiedsbeskermheer en –vrou, Oordbeskermheer en –vrou en Kommando-beskermheer en –vrou, word aangestel vir dieselfde periode as die betrokke bestuursliggaam en met die inhuldigingsfunksie word die periode van aanstelling aangekondig.

- 9.4 Die benoeming van 'n Beskermheer geskied soos volg:
- 9.4.1 'n Gemotiveerde aansoek word aan die betrokke bestuursliggaam voorgelê vir oorweging:
- a) In die geval van 'n Hoofbeskermheer lê die hoofdagbestuur die aansoek voor aan die hoofbestuur tydens die vergadering wat die Kongres voorafgaan;
  - b) In die geval van 'n Gebiedsbeskermheer lê die betrokke gebiedsbestuur die aansoek voor aan die hoofbestuur;
  - c) In die geval van 'n Oordbeskermheer lê die betrokke oordbestuur die aansoek voor aan die gebiedsbestuur;
  - d) In die geval van 'n Kommandobeskermheer lê die betrokke kommandobestuur die aansoek voor aan die oordbestuur.
- 9.4.2 Stemming geskied per geslote stembriefie op 'n vergadering van die betrokke bestuursliggaam,
- 9.4.3 Die benoeming word goedgekeur nadat minstens twee derdes van die aanwesige lede van die betrokke bestuursliggaam ten gunste van die benoeming stem.
- 9.5 Nadat die benoeming van 'n beskermheer deur die betrokke bestuursliggaam goedgekeur is, nader die betrokke hoofdagbestuur, gebiedsdagbestuur of kommandodagbestuur die benoemde persoon om te verneem of hy/sy die benoeming aanvaar.
- 9.6 Indien sodanige persoon te kenne gee dat hy/sy die benoeming sal aanvaar onderhewig aan die vereistes vervat in artikels 9.3 van hierdie hoofstuk, word die besluit bekendgestel op 'n wyse waarop die betrokke dagbestuur besluit.
- 9.7 Die inhuldiging van 'n beskermheer geskied tydens 'n funksie wat vir dié doel deur die betrokke dagbestuur op eie koste gereël word.
- 9.8 'n Beskermheer mag wel aktiewe voortrekkerdrag dra.

## **10. AANSOEK OM LIDMAATSKAP AS JEUGLEDE, OFFISIERE, STAATMAKERS, HEEMRAADSLEDE EN JEUGVRIENDE**

- 10.1 Aansoek om lidmaatskap van *Die Voortrekkers* geskied op die voorgeskrewe aansoekvorm indien die voornemende lid aan die vereistes vir lidmaatskap soos in die grondwet bepaal, voldoen n!:
- 10.1.1 In die geval van voornemende jeuglede moet die jeuglid se ouer/voog hom vergewis van die grondslag, wese en doelstellings van *Die Voortrekkers* en skriftelik toestemming gee dat die jeuglid daaraan blootgestel word.
- 10.1.2 In die geval van lidmaatskap van offisiere, staatmakers en heemraadslede moet 'n voornemende lid:
- a) Die grondslag, wese en doelstellings van *Die Voortrekkers* onderskryf en uitleef;
  - b) 'n Lidmaat wees van 'n aanvaarde Christelike<sup>1</sup> kerk.
- 10.2 Voornemende lede moet vooraf ook die lidmaatskapbrosjyre van *Die Voortrekkers* bestudeer en op die aansoekvorm bevestig dat die inhoud daarvan aanvaar word.
- 10.3 Aansoek om lidmaatskap van jeuglede:
- 10.3.1 Nadat 'n aansoek om lidmaatskap as 'n jeuglid ingedien is, neem die voornemende jeuglid aan span- en kommando-aktiwiteite deel.
- 10.3.2 Wanneer die kommandodagbestuur oordeel dat die aansoek 'n eerlike bona fide aansoek is, word die aansoek om lidmaatskap tesame met die ledegeld aan gebiedsbestuur en hoofbestuur vir die betrokke jaar direk deur die kommandodagbestuur of ander bestuursliggaam na die betrokke gebiedsdagbestuur gestuur vir oorweging.
- 10.3.3 Na aanvaarding van lidmaatskap kan die jeuglid ook aan Oord-, Gebied-, en Nasionale Voortrekkeraktiwiteite deelneem.
- 10.3.4 Wanneer daar 'n redelike mate van twyfel rondom die aansoek bestaan kan sodanige kommandodagbestuur of ander bestuursliggaam die aansoek vir 'n maksimum van twee maande terughou voordat dit by die betrokke gebiedsdagbestuur ingedien moet word.
- 10.3.5 Die betrokke gebiedsdagbestuur is bemaagtig om probleemgevalle volgens meriete te hanteer.

---

<sup>1</sup>Grondwet, artikel 32.7

- 10.4 Aansoek om lidmaatskap as volwasse lid:
- 10.4.1 Nadat 'n aansoek om lidmaatskap as volwasse lid ontvang word, word dit onmiddellik tesame met die ledegeld aan die gebiedsbestuur en hoofbestuur vir die betrokke jaar, waar toepaslik, deur die betrokke kommandodagbestuur ingedien wanneer die kommandodagbestuur oordeel dat die aansoek 'n eerlike bona fide aansoek is.
- 10.4.2 Wanneer daar 'n redelike mate van twyfel rondom die aansoek bestaan kan sodanige kommandodagbestuur of ander bestuursliggaam die aansoek vir 'n maksimum van een (1) maand terughou voordat dit by die betrokke gebiedsdagbestuur ingedien moet word. In die tydperk kan die betrokke volwasse lid nie op sy eie met jeuglede werk nie.
- 10.4.3 Die betrokke gebiedsdagbestuur moet probleemgevalle volgens meriete te hanteer oor gebiedsgrense heen;
- 10.4.4 'n Volwasse lid se aansoek moet wel binne twee (2) maande gefinaliseer word.
- 10.5 Indien 'n voornemende lid probeer om 'n aansoek buite die amptelike kanale om (byvoorbeeld in die media) tot verleentheid of nadeel van *Die Voortrekkers* te bevorder, verval so 'n aansoek summier.
- 10.6 Appèl na die betrokke gebiedsdagbestuur en na die hoofdagbestuur is moontlik wanneer 'n mindere liggaam nie die aansoek om lidmaatskap van 'n voornemende lid aanbeveel nie.
- 10.7 Alle lede word as lid van 'n Voortrekkerkommando of as lid van 'n span of 'n Veldkornetskap los van 'n Voortrekkerkommando of as lid van 'n Staatmakergroep geregistreer op die Sentrale Administrasie Stelsel (SAS) van *Die Voortrekkers*.
- 10.8 Bewys van lidmaatskap word aan die voornemende lid verskaf.

## 11 LEDEGELD

- 11.1 Elke lid van *Die Voortrekkers* betaal jaarliks aan die Voortrekkerkommando, los span of los Veldkornetskap of Staatmakergroep waarby hy geregistreer is, soveel ledegeld as waarop die hoofbestuur, gebiedsbestuur en kommando- of veldkornetskapsbestuur of staatsmakerraad besluit onderworpe aan die bepalings van artikels 11.2 tot 11.7 van hierdie hoofstuk.
- 11.2 Beskermhere, Erelede en Voortrekkervriende betaal nie ledegeld nie.
- 11.3 Jeuglede wat inwoners is van weeshuise, inrigtings vir dowes, blindes, liggaamlik gestremdes en soortgelyke inrigtings, betaal nie ledegeld nie.
- 11.4 'n Persoon betaal nie dubbele ledegeld wanneer hy as 'n Offisier, Heemraadslid en/of 'n Staatmaker optree nie.
- 11.5 'n Persoon betaal nie dubbele ledegeld wanneer hy aan meer as een Voortrekkerkommando, los Veldkornetskap of Staatmakergroep as 'n lid verbonde is nie met die verstande dat hy formeel registreer en ledegeld betaal in die kommando waar hy die hoogste pos beklee.
- 11.6 Ledegeld is onmiddellik met aansluiting en daarna met voorsetting van lidmaatskap jaarliks voor die datum wat Hoofbestuur van tyd tot tyd bepaal, vir die betrokke jaar betaalbaar.
- 11.7 'n Lid se lidmaatskap verval indien sy lidmaatskapsgelede nie voor bogenoemde sperdatum vir die betrokke jaar betaal is nie en mag hy aan geen verdere aktiwiteite van *Die Voortrekkers* deelneem nie. Hy verbeur ook 'n toekenning vir getroue diens vir die betrokke jaar.
- 11.8 Lidmaatskapsgelede vir die betrokke jaar en voorafgaande jare moet ten volle betaal wees ingeval van:
  - 11.8.1 Inskrywing vir Voorslag en Presidentsverkenner assessering.
  - 11.8.2 Nominasie en verkiesing tot enige bestuursliggaam van *Die Voortrekkers* behalwe in die geval van stigting van 'n nuwe Voortrekkerkommando, Los Veldkornetskap of Staatmakergroep of waar 'n nuwe lid van die gemeenskap gewerf word om aan 'n verkiesing van dagbestuur op gemeenskapsvlak deel te neem nie. Indien die persoon tot bestuursliggaam verkies word moet hy/sy onmiddellik voortgaan om aansoek om lidmaatskap deur te gee.
  - 11.8.3 Nominasie en verkiesing tot enige jeugraad van *Die Voortrekkers*.
  - 11.8.4 Toekenning van besondere prestasies soos in hoofstuk elf (11) van die Reglemente

- uiteengesit.
- 11.8.5 Toekenning van getroue diens, graadwiel of ABC erkenning aan die einde van die betrokke jaar.
- 11.8.6 Benoeming as afgevaardigde of sekundi na 'n meerdere vergadering van *Die Voortrekkers*.
- 11.9 Die betrokke bestuursliggaam is verantwoordelik vir die vordering van die totale ledegeld soos in artikel 11.1 omskryf en moet die hoofbestuur en gebiedsbestuur se gedeelte aan die betrokke gebiedskantoor oorbetaal met nuwe aansoeke en alle ander ledegelde voor die gegewe sperdatum.
- 11.10 In die jaar van stigting van nuwe Voortrekkerkommando's, Los Veldkornetskappe of Staatmakergroepe word ledegelde gevorder maar nie aan *Die Voortrekkers* oorbetaal nie. Dit word gebruik om die administrasie in die gemeenskap te vestig.

## 12. STUITING

Elke volwasse lid moet die onderstaande onderneming by aansluiting gee. Ander volwassenes wat by *Die Voortrekkers* betrokke is, moet ook voordat die aktiwiteit waarby hulle betrokke is 'n aanvang neem, dieselfde onderneming gee:  
*"Ek aanvaar dat ek in die uitvoering van my Voortrekkerverpligtinge gestuit kan word, indien daar na die redelike oordeel van die betrokke bestuursliggaam ondersoek ingestel moet word na my optrede indien dit daarop sou dui dat dit in stryd is met die grondwet, reglemente, gedragskode en prosedures van Die Voortrekkers.*

## 13. BEËINDIGING VAN LIDMAATSKAP

- 13.1 Lidmaatskap van *Die Voortrekkers* kan onder die volgende omstandighede beëindig word:
- 13.1.1 Wanneer 'n lid skriftelik bedank en die betrokke bestuursliggaam die bedanking aanvaar;
- 13.1.2 Wanneer 'n lid sonder opgaaf van aanvaarbare redes ondanks drie aanmanings, waarvan die finale skriftelik is, ophou om Voortrekkerwerk te doen;
- 13.1.3 Wanneer 'n lid verhuis en nie binne drie maande by 'n ander Voortrekkerkommando of Los Veldkornetskap of Staatmakergroep aansluit nie;
- 13.1.4 Wanneer 'n lid versuim om sy ledegeld voor die sperdatum te betaal;
- 13.1.5 Wanneer daar dissiplinêr teen 'n lid opgetree word as gevolg van 'n optrede wat teenstrydig is met die grondwet, reglemente en inhoud van die lidmaatskapbrosjure;
- 13.1.6 Wanneer 'n lid teenstrydig optree met die ondernemings wat hy in verband met lidmaatskap gegee het;
- 13.1.7 Wanneer 'n lid vals inligting in sy aansoek om lidmaatskap verstrek het.
- 13.2 'n Lid se lidmaatskap word nie beïnvloed wanneer hy nie in 'n bepaalde jaar 'n getroue diens kenteken, graadwiel of ABC toekenning ontvang het nie.
- 13.3 Die betrokke bestuursliggaam moet met beëindiging van lidmaatskap te alle tye die rede vir beëindiging van lidmaatskap op die Sentrale Administrasie Stelsel (SAS) van *Die Voortrekkers* aandui.

## 14. KOMMANDOVERLOF

- 14.1 'n Gebiedsdagbestuur kan dienserkenning vir kommandoverlof vir volwasselede op meriete oorweeg op voorwaarde dat die aansoek ontvang word voordat sodanige verlof in aanvang neem.
- 14.2 Kommandoverlof is nie in die geval van penkoppe, drawwertjies en verkenners moontlik nie, behalwe in die geval van langdurige siekte.
- 14.3 Verlof vir volwasselede kan net oorweeg word nadat die lid minstens vyf (5) jaar ononderbroke getroue diens gelewer het.
- 14.4 Die verloftydperk moet normaalweg nie een (1) jaar oorskry nie.
- 14.5 Dienserkenning vind eers plaas nadat die lid een (1) jaar getroue diens gelewer het na verstryking van die verloftydperk.

## **15. OORPLASING VAN LIDMAATSKAP**

- 15.1 Die toepaslike oorplasingvorm word voltooi deur die Adjunkkommandoleier (AKL) Administrasie van die Voortrekkerkommando wat die lid ontvang.
- 15.2 Die vorm word dan aangestuur na die Voortrekkerkommando se gebiedskantoor om oorplasing op Sentrale Adminstrasie Stelsel (SAS) te reël. Indien dit oor gebiedsgrense is, word die vorm na hoofkantoor aangestuur vir oorplasing.
- 15.3 In die geval van verhuisings moet die Adjunkkommandoleier (AKL) Administrasie van die gewese Voortrekkerkommando die verhuising deurgee na die betrokke gebiedskantoor.